

2106

484

# MANVEL DV BON CITOYEN.

OV  
BOVCLIER DE DEFENSE  
LEGITIME,

Contre les assauts de l'Ennemy.



A PARIS,  
Par ROBERT SARA, ruë de la Harpe,  
au Bras d'Hercule.

---


M. DC. XLIX.

*Avec Permission.*

M. A. N. V. E. B.  
D. V. B. E. C. I. T. O. K. E. N.

BOUCHER DE D'ENFER  
L. G. I. T. I. N. I.

John's Church of the Holy Trinity



A PARIS,


PAR ROBERT SARA, rue de la Harpe,

au Bass de l'Horloge,

M. D. C. XLIX.

chez l'Imprimeur,





# MANVEL DV BON CITOYEN.

OV

## BOVCLIER DE DEFENSE LEGITIME, Contre les assauts de l'Ennemy.

**E** sçay bon gré à nos Predicateurs de ne s'estre point encore ingerez d'animer le peuple à la iuste guerre où il s'est embarqué de luy-mesme par vne legitime defensue : Et de verité il ne falloit pas de consultation, ny d'exhortation, où il n'y auoit pas de doute. On me veut oster le pain & la vie ; ie le conlerue, ie la defens. Cela est naturel. Les hommes & les bestes sont en possession de ce droit : Il est escrit dans le cœur de tous les animaux auparauant le Decalogue, & la Loy des douze Tables. Mais parce qu'il y a des esprits dénaturez qui voudroient étouffer la lumiere de cette verité, & qui se sont volontairement iettez dans vn abrutissement pire que celuy de Nabuchodonosor, par l'aersion qu'ils ont de Dieu & de toute humanité, il faut empescher que leur contagion & leur exemple n'en attire d'autres qui ne sont pas encore totalement corrompus. Car par malheur nous sommes d'une legere & inconstante nation, qui fait toutes choses par mode & par singerie, sans considerer ce qui est vtile, ce qui est honneste & conuenable. Patience, si cet abus se terminoit aux habits, & s'il n'auoit lieu que parmy la ieunesse de l'Academie, ou du Regiment des Gardes : Mais nos vieillards mesmes, ausquels il seroit bien de se tenir aux mœurs anciennes, se laissent emporter au torrent du temps present, & changent leurs gands & leurs cordons de chapeau à l'appetit & à la mode des ieunes gens. Vn Barbier, vn Tailleur, vn Maistre à danser vn peu entreprenans & inuentifs, vont changer toute la face de la Cour en moins de huiet iours, aussi facilement que Bellerose fera la Scene de son Theatre. Depuis trois iours les femmes ont pris les manches de

nos chemises; il se trouuera bien tost quelque effeminé, qui prendra celles des femmes, & à l'instant tous les gentils en feront de mesme. Ces choses semblent de peu d'importance, mais elles sont consequence & argument pour les plus grandes. Vn Blasphemateur du Marais du Temple, ou de chez la B. \* \* \*, n'a pas plustost inuenté vn nouveau reniement, qu'il se communique par tous les Berlands de la Ville & du Fauxbourg saint Germain, & retentit en la bouche de tous les Laquais. Les bons Compagnons en partent huiet iours plustost, pour en faire part dans les Prouinces. Il n'y a qu'en France que cet abominable abus se pratique. Car en quel autre endroit de la terre est-il sorty de la bouche d'un homme ce vilain refrein de débâche, Pour moy par raison ie butte à deuenir beste brutte? Cependant nous l'auons entendu chanter, & auons veu des spirituelles qui trouuoient que c'estoit vne belle rencontre. Quel auenglement, & quelle fureur? Comme aussi de vouloir introduire parmy nous des abominations qui ne sont point du crû de nos Prouinces, qui sont contre le goust & le gré de nos temperamens, & qui ne nous appartiennent non plus que les flammes du Mont Ætna à celuy de Montmartre. Cependant pour complaire à quelque coryphée de volupté déprauée, nous voyons que de vilaines gens s'entretiendront de ces saletez, & en feront sujet de vanité, qui d'ailleurs n'en ont pas mesme la tentation. Ce qui ne vient que de cette conformité & mode maudite, par laquelle nous adhérons aux mauuais exemples. Dieu souverain, quelle grande reformation vous feriez dans cet Estat, si vous luy vouliez donner vn bon Roy? Nous n'aurions point affaire de Predicateurs, ny de Pasteurs: Nous pourrions fermer le liure de vos Escriptures & de vostre Euangile: Nous nous sanctifierions sur le modele & le patron d'un pieux & sage Prince. Donnez-le nous tel, ô grand Dieu! eleuez cettui-cy dans la discipline de vostre Loy; inspirez-luy la pieté & la iustice, & ne souffrez pas qu'il prenne le mauuais air d'une pernicieuse education; chassez de bonne heure ce malheureux Demon qui possede sa Cour & sa personne; nous vous en prions au nom de nostre Seigneur Iesus Christ vostre fils, & y ioinons les vœux de tout ce grand Royaume. Apres auoir mis Dieu de nostre costé par vne humble, feruente & con fiance inuocation, essayons de ramener & de conuertir ces consciences confisquées qui s'opposent au bien public, & qui ont renoncé à l'humanité, & qui par

vne



vne orgueilleuse opiniaſtreté nous veulent afferuir & aſſujettir contre l'eſperance de liberté que la Prouidence nous promet. Mais eſt-il donc poſſible qu'il y aye des hommes qui veüillent eſtre eſclaves de leur conſentement ? Regulierement il n'y en doit point auoir ; il y en a neantmoins ; & nous auons veu dans les Loix Romaines que des hômes libres ſe ſont vëdus & rendus eſclaves à prix d'argent : encore aujour'd'huy nous en voyons qui ſ'obligent dans les Galeres aux ſujetions de la peine & de la ſeruitude. Bien dauantage, il ſ'eſt trouué vn homme dans l'armée du Comte Maurice, pendant le dernier ſiege de Reinbergue, le quel moyennant vne ſomme de cent eſcus ſ'offrit à eſtre pendu pour vn autre ſur lequel le ſort d'vne decimation eſtoit tombé. Son deſſein eſtoit de laiſſer cette ſomme à ſa femme ou à ſes enfans, ne ſe voyant pas en eſtat de leur laiſſer rien du tout lors qu'il mourroit, ou par maladie, ou par la fortune des armes. Ces penſées là ſont horribles & monſtrueuſes : mais en fin il y a deſteſtes aſſez creuſes pour les former, & il ſe trouue des hommes qui ont dépoüillé l'humanité : des Timons, des Lycantropes, deſquels on ne doit attendre ny religion vers Dieu, ny pieté pour la patrie. Leur Dieu c'eſt leur auarice, & cette auarice eſt la Metropole & l'Arſenac de tous les maux & de tous les crimes. C'eſt cette auarice qui a fait les flatteurs & les donneurs d'aduiſ ; c'eſt elle qui a fait les Maletostiers, les Fuſeliers, & les Intendants. Courons à cor & à cry cette monſtrueuſe beſte, qui eſt pire que les Allemands & les Polagues, & plus pernecieuſe à cet Eſtat, que le Mazarin meſme. Elle eſt ſeulement capable d'occuper toutes nos forces, tant elle eſt terrible, tant elle eſt opiniaſtre & acharnée, & ie ne ſçay ſi l'armée de Paris & celle de Monſieur de Longueuille ſeront ſuffiſantes pour la mettre à la raiſon. Voicy neantmoins deux aduiſ que ie tiens indubitables, ſi on les veut exécuter de bonne foy. C'eſt vne ſeuere Chambre de Juſtice contre les Maletostiers, leurs fauteurs & adherans ; & vne Loy ſumptuaire. Par la Chambre de Juſtice on fera repetition & reparation de tous les larrecins du paſſé ; par vne Loy ſumptuaire on preuiendra ceux de l'aduenir. Si quelqu'un a quelque meilleur aduiſ à propoſer, ie ſuis preſt de l'entendre & d'y adherer ; car dans cette neceſſité vrgente, ſi nous ne depouſons toute ſorte de jaloſie & d'attachement à noſtre propre ſens, nous ne fêrons rien qui vaille, & il nous arriuera comme aux conſultations où l'on appelle les Medecins des deux Facultez :

pendant qu'ils contestent du poinct d'honneur, & refusent de passer à l'aduis les vns des autres, le malade meurt entre leurs mains. Ne vous souuenez-vous point des Estats de six cens quatorze : leur deputacion cousta plusieurs millions aux Prouinces de France. Ils vindrent icy disputer de la Chappe à l'Euesque & de la puissance du Pape. Le Cardinal du Perron estalla ses belles connoissances, & trionfa de bien dire : Le sieur Sauaron produisit les fruicts de ses longues & scauantes lectures : les Euesques de Montpellier, de Grenoble, du Belley firent des Predications tres-ingenieuses & tres-eloquentes : les Marquis de Senecey & du Pont St Pierre Presidens de la Noblesse, & plusieurs autres grands Seigneurs y protesterent vn grand zele. En fin de compte la France leur demeura redevable de leur bonne volonté, & nulle reformation ne s'en ensuiuit. Si au lieu de consommer le temps en prefaces & en émulations d'eloquence, ils fussent entrez en matiere vile & necessaire, il en eust reussi quelque bon effet. Mais ces grandes & ceremonieuses conuocations, & qui sont faites par le choix des Fauoris, qui gouuernent, & qui tiennent la bourse, ne produisent que du faste, de l'ambition, & de la vanité. Des Estats libres & des deputations legitimes faites par le libre choix des Ecclesiastiques, des Nobles & du Tiers Estat, pourroient produire quelque important succez. Mais auant que cette Assemblée se puisse faire seurement & legitimement, les années entieres se passeront, & cependant on fera du feu de nos autres villages ainsi que de Charenton. Mais pourquoy nous amuser à vne conuocation d'Estats Generaux? Chaque Prouince ne les peut-elle pas assembler sans frais & sans indiction? Chaque Parlemēt n'est-il pas composé des mesmes personnes qui cōposent les Estats. Messieurs les Euesques, & la haute Noblesse n'y ont-ils pas entrée, seance & voix deliberatiue? & lors qu'ils feront la premiere démarche pour procurer le bien du peuple, ne seront-ils pas secondez de ses vœux, prieres, & acclamations? Ne peuuent-ils pas concerter avec les notables Bourgeois & Marchands sur les occurences diuerfes par des assemblées de ville, & par des accommodemens conuenables, sans s'arrester trop superstitieusement aux rangs & aux formalitez qui suffoquent la iustice. Que chaque Parlement recherche les cruantez & les exactions qui ont esté faites dans son destroit, & qu'il les punisse. Cela se peut faire sans toucher aux droicts Royaux, ny à l'autorité Royale : au con-



traire c'est au nom de cette autorité, & selon sa droicte intention qu'ils agiront. Que veulent donc dire nos aduersaires quand ils alleguent que la Maïesté Royale est offensée lors que l'on crie au meurtre sur l'oppression d'un Fuselier ou d'un Gabelleur? Quelle parenté y a-t'il entre la Railliere & Catelan avec nos Roys, pour qualifier de rebellion la iuste resistance que l'on fait à leurs exactions? que veut dire cettuy-là qui a mis dans son placart que l'Estat de France est le plus Monarchique du monde; comment cela se peut-il entendre qu'à nostre honte, & à la confusion de nos Rois? qu'il nous dise un peu ce que c'est qu'une Monarchie excessiue. Et quelle autre satisfaction pretendent ces gens-là, sinon qu'en reduisant leurs Concitoyens & Compatriotes sous le pressoir & la torture, de s'eriger en satellites & en confidens de cruauté, de voluptez, & de toutes sortes de pernicieux conseils? Ils se distingueront peut-estre par emplois & par offices, comme ils ont desia fait: l'un prendra l'intendance du Theatre & des Comedies, l'autre des festins & de la bonne chere, l'autre des cartes & des dez; ils auront mesme l'impudence d'y faire attribuer des titres & des priuileges, ce sera peu de chose de les denommer comme ceux de Tibere, ou de Caligula, *AVoluptatibus*, à *Tripudis*, à *Proffibulis*. Il y aura un grand Blasphemateur, un grand Fuselier, un grand Berlandier, un maître des impies, &c. Le papier François resiste à l'escriture de cette infamie, & voila à peu pres le bref estat des Officiers de ton Monarque extraordinaire, dont Dieu nous preserue s'il luy plaist; car par sa diuine grace nous n'en auons point encore veu en ce Royaume, & dans cette zone temperée de la France, qui ayent approché de ces excez. Et Louys XI. dont on parle tant, ne peut estre valablement accusé que de trop de morosité sur ses vieuxans, & de trop de ialousie de son successeur. Ce qui le ietta dans des terreurs qui le rendirent moins accessible, & moins pitoyable aux necessitez de son peuple, dont il a merité le reproche & la malediction iusques à nos iours; au lieu que nous adorons la bonté & la mansuetude de Louys XII. & que nous admirons la clemence d'Henry IV. pour auoir admis le Duc du Mayne à son estroite confidence & bienveillance, qui luy venoit de contester sa couronne, & pour s'estre sincerement reconcilié avec tous ses ennemis, & qui vouloit mesme pardonner au Marechal de Biron, sans la resistance genereuse que luy firent le Chancelier de Bellièvre, & le President

de Harlay, dont la memoire soit en eternelle benediction. C'estoit vn Roy celuy-là, c'estoient des Magistrats, dont les statues deuroient estre erigées au plus éminent lieu de la grand' Chambre du Parlement. Loin donc, impudent Escriuain, ton Monarque exorbitant. Nous en voulons vn regulier & moderé, & qui ne soit point empoisonné par tes pernicieuses instructions. Ne va donc point declarer à nostre ieune Roy, ny à la Reyne sa mere, ce qui se passa sous Charles VI. si tu ne leur expliques de bonne foy la verité de cette histoire, & si tu ne leur fais aussi entendre les malheurs des Roys & des Reynes qui ont abusé de leur autorité. Te m'estorñe en cet endroit, & tous les gens de bien tombent dans la mesme pensée, d'où vient que nos Capucins qui n'ont rien n'y à pretendre, ny à craindre, quand ils preschent deuant les Roys, ne leur disent franchement les veritez necessaires dont la cognoissance & la pratique establiroit leur condition, & leur gagneroit la bienveillance des peuples, au lieu que la flatterie & le mensonge les esbloüit, & les fait chanceler, & souleue tout le monde contre leur gouuernement? Est-il iamais arriué qu'une discrete & pieuse reprimende aye fait tort à vn Prince? & n'arriue-il pas tous les iours que les flatteries les perdent & les damnent? Je ne veux pas neantmoins qu'on leur rompe la teste par vne longue narration des histoires passées, ny qu'on lasse leurs yeux par des lectures importunes. Qu'on les aduertisse seulement de considerer ce qui se passe dans les Royaumes voisins. Qu'ils demâdent à Renaudot ce qui s'est fait ces derniers mois à Constantinople: car le cas d'Angleterre est trop odieux. Est-il possible qu'on les laisse dans l'ignorance de ces veritez? est-il possible qu'ils n'en sçachent pas faire l'application? Cependant il n'est que trop certain qu'on leur cele, ou qu'on leur déguise les plus importantes occurences; ie ne l'aurois pas creu si ie ne l'aurois appris de tres-bonne part. Vne personne familiere à Monsieur d'Engoulesme le conjurant de contribuer ses soins au bien de l'Estat dans les occasions presentes, & que tout dépendoit de l'éloignement du Cardinal Mazarin; qu'il auoit qualité & autorité pour porter cette parole à la Reyne: Il respondit qu'il n'osoit pas l'entreprendre. Je sçay encore d'aussi bonne part, qu'une autre personne s'entretenant il y a quelques années avec ce mesme Prince, sur le sujet du Cardinal de Richelieu, & qu'il ne deuoit pas luy rendre tant de deference; Il luy repliqua que ce n'estoit point à luy à s'opposer



s'opposer à cet important Ministre, & luy allegua pour toute excuse  
 les respects que luy rendoit le feu Prince de Condé; de sorte que si  
 les personnes de cette qualité, de cette expérience & suffisance, n'osent  
 contrarier vn Fauory, ny proposer vn aduis salutaire, quand il n'est pas  
 du goust du Souuerain, nous ne deuons plus rien attendre, sinon du  
 costé de Dieu, ou de quelqu'un de ses Prophetes. A present neant-  
 moins que la Piscine est esmeüe, & qu'il se presente quelque espe-  
 rance de guerison pour ce pauvre Estat qui est paralytique de la plus  
 grande partie de ses membres: si nous sommes assez heureux pour y  
 bien reüssir, ie voudrois qu'entre les bons regimes qui seroient proposez  
 pour l'aduenir, il y eust vn iour de la semaine auquel leurs Majestez  
 prissent la peine d'entendre les plaintes de leurs subjets: que pour cet  
 effect, & pour leur adoucir ce trauail, ils eussent des Introduceurs,  
 des Auditeurs & autres Officiers, comme sont les Prestaues de Se-  
 ptection, & les Chaoux d'Orient; mais sur tout de bons & fideles  
 Ecclesiastiques, tantost d'un ordre & tantost d'un autre, qui seroient  
 porteurs & rapporteurs des supplications du peuple vers le Prince,  
 & des bienfaits du Prince vers le peuple, *Hinc precum, hinc donorum*,  
 comme les bons genies des Philosophes Platoniques, ou, pour mieux  
 dire, comme nos Anges Gardiens & Mediateurs: Ils en seroient bien  
 plus sages & plus absolus, & leur autorité bien plus affermie par la  
 bienveillance de leurs subjets. Mais vne chose pouuons-nous dire  
 sans flatterie & sans desguisement, que les Princes ne sont point tant  
 coupables de nos maux, comme sont les flatteurs & les perfides Con-  
 seillers: & peut-estre que le plus ferme d'entre nous, s'il estoit atta-  
 qué d'autant de tentations & de secouffes qu'on leur baille, chancel-  
 leroit & succomberoit plus lourdement & dangereusement qu'ils  
 ne font pas. C'est pourquoy il faudroit faire vne instante & serieuse  
 poursuite contre ces faux Ministres qui les assiegent, les possèdent, &  
 les charment. Car puis que les Princes ne voyent & n'entendent que  
 par leurs organes artificieux, il est impossible qu'ils soient informez  
 de la verité des choses, impossible qu'ils en iugent autrement que  
 par l'information corrompue qu'ils en ont. Au reste les gens de bien,  
 qui pourroient leur parler franchement, & consciencieusement, leur  
 sont deseriez comme des fols & des extrauagans; & comme leur  
 propre modestie les retient, l'impudence des meschans les rebutte,  
 & la calomnie les decrédite. Comment est-ce donc que les Roys

sçauront la verité ? peut-estre par les reuelations immediates de Dieu ; cela est fort rare : ils la pourroient apprendre des Ministres del'Eglise, si on leur en laissoit la liberré, & si leurs Fauoris ne les promenoient pas à tel auditoire qu'il leur plaist, & ne leur donnoient pas les impressions & les preuentions d'esprit pour leur faire haïr ceux-cy, ou ceux-là. Ont-ils pas descricé comme vn heretique, l'vn des plus zelez Predicateurs qui aye paru de nos iours ? en ont-ils pas emprisonné vn autre ? Ont-ils pas formé ce scrupule, Qu'il n'est pas expedient qu'vn mesme homme soit Confesseur & Predicateur du Roy, de peur de taxer en preschant les fautes qu'il auroit oüyes en Confession ? Nous ne voulons pas faire les Roys de pire condition que les autres fideles, en leur ostant le choix de leurs Confesseurs : mais si aurions-nous grande raison de desirer qu'ils en changeassent quelquefois, & en essayassent des plus capables qui fussent informez des desordres & des necessitez publiques, & pourueus d'une excellente vertu. Est-il possible que ce vieux Cordelier Espagnol, qui n'entend, ny ne parle nostre langue, & qui n'a commerce quelconque parmy nous, soit capable de diriger la conscience d'une Reyne de France, préposée à vn si vaste Royaume, chargée & responsable du gouuernement de tant d'ames, & de tant d'affaires ? Il seroit donc d'une extreme importance, que tandis que le Roy est en aage de recevoir instruction & correction, on luy pourueust pour Confesseur du plus sage & plus conscientieux Ecclesiastique de tout son Royaume, qui le nourrirait aux maximes de l'Euangile, en la crainte de Dieu, au respect de sa mere, & en l'amour de son peuple. Lors qu'il sera en aage de discretion, ce seroit vn excellent conseil de luy persuader d'en auoir plusieurs, & de leur commander en qualité de Roy, de luy bien commander en qualité de Pasteurs ; & apres leur auoir fait ce commandement au nom de la Maïesté, de se soumettre puis apres à eux à titre de fragilité, d'humanité, & de filiation. L'ancienne Theologie des Poëtes estoit celle-cy, que Iupiter le Roy des hommes & des Dieux auoit estably les Destinées, & qu'apres les auoir vne fois establies, il leur obeïssoit tousiours, *Semel iussit, semper parat*. On condamne, & peut estre à bon droit, cette pompe exterieure, & cette dignité esclatante des Prelats de l'Eglise ; mais si en retrenchant quelque chose de ce lustre, ils se maintenoient en la solide & legitime autorité de leurs predecesseurs, ils remedieroient à beaucoup



de crimes & d'inconueniens où le Magistrat seculier n'ose pas s'interposer. Mais nous auons veu, hélas ! à la confusion d'un Royaume Tres-Chrestien, qu'un genereux Prelat voulant faire le deu de sa charge, & se presentant pour appaiser vne effroyable sedition, est impudemment qualifié du nom de Tribun, par des bouffons de Cour, & est contraint de s'en retourner sans effect, apres de tres-prudentes, tres-sainctes, & tres-charitables supplications ; & qui scait si toute cette fascheuse suite n'a point esté la vengeance de ce mespris ? N'aignissons point cet vlcere en le remaniant, mais rendons la louange à la memoire des siecles passez. Ceux de la ville d'Antioche pendant vne sedition abbatirent les statues de l'Imperatrice. L'Empereur Theodose venoit à main armée, pour vanger cette injure, l'Euesque Flavianus alla au deuant. Durant son voyage toute la ville estoit en inquietude & en apprehension : on fit des prieres publiques dans l'Eglise, & saint Chrysostome qui estoit comme le Coadjuteur de cet Euesché, par les bons offices qu'il y rendoit, montoit tous les iours en chaire, & les fournissoit de consolations & d'exhortations sur l'occurrence & la necessité qui les pressoit, & entre les autres, se fondant sur l'autorité & sur le caractere de ce saint Euesque, il leur disoit. Comment est-ce que celui qui a pouuoir de remettre les crimes & les iniures qui sont commises contre Dieu, n'aura pas le credit de composer de celles qui sont faites contre l'Empereur, qui n'est qu'un homme ? Il en arriua selon la creance & la prediction de saint Chrysostome. Le saint Patriarche s'estant présenté à l'Empereur, les armes luy tomberent des mains, & il se défit avec sincerité & generosité de tous ses ressentimens, sans aucune reserue de vengeance. Ce mesme Empereur, fort peu d'années apres, ayant exercé quelque feuerité contre la ville de Thessalonique, il souffrit avec patience la correction & la penitence publique, qui luy fut imposée par l'Archeuesque de Milan, saint Ambroise. Ainsi en vsoient les anciens Princes Chrestiens, ainsi en vseroient ceux de nostre siecle s'ils n'estoient pas obsedez de tant d'impies & perfides Courtisans. Mon aduis seroit, puis que nous en sommes sur l'article de la Religion, que dans le Formulaire des Prosnes on excommuniast par chaque Dimanche tous Flatteurs & Fauoris indignes, ainsi que les forciers & les noïeurs d'esguillettes ; aussi bien a-t-on tousiours creu que ces violentes & incomprehensibles affections que

Les Princes resuoyent à ces damnable personnes, estoient conciliées par caracteres & sortileges. C'est assez de ce chef. Disons quelque chose de nos Magistrats seculiers, de leur pouuoir en general, & de leur legitime procédure dans les affaires presentes. Les sieurs Molé, Viole, Nouion, Nicolai, sont Citoyens de Paris, puis qu'ils y sont nez, baptisez, & demeurans; par consequent obligez à toutes les fonctions de bons & fideles habitans, & en communion de toutes sortes d'interests avec les autres Bourgeois. Ce qui les distingue du commun des autres, ce sont les charges de Magistrature qu'ils y exercent, pour lesquelles le peuple leur est obligé de respect & d'obeissance, à cause du rang qu'ils tiennent dans les Compagnies souveraines, avec lesquelles cognoissans & iugeans des differens des parties en la forme qui leur est prescrite par les Loix, & au nōbre competent & limité par les mesmes Loix, ils font Arrest dont il n'y a point d'appel. D'où il s'ensuit qu'ils n'ont pas vne simple subordination à la Majesté Royale, mais qu'ils en font portion en fait de iudicature, comme les Connestables & Generaux d'armées au fait des armes. Car c'est vne maxime qu'il faut tenir pour certaine, & les supposts de la domination violēte ne la sçauroient destruire, Que tout de mesme que l'ame raisonnable qui est répandue dans vn corps, en ce membre cy elle informe, & fait vn bras, en cet autre vne jambe, vne cuisse, vne dent, vn doigt, & ainsi du reste. Tout de mesme en arriue-t'il dans le corps politique d'un Estat, de quelque nom qu'il soit qualifié, soit Monarchique, Aristocratique, ou Democratique, c'est à sçauoir que l'autorité, le droit & la faculté qu'a ce Peuple-là de se gouverner & de se maintenir, se répand & se communique par tout le corps politique; la teste duquel s'appelle vn Roy, vn Empereur ou vn Duc; les autres parties nobles & principales sont Conseillers, Magistrats, Gouverneurs, Capitaines, Consuls, Escheuins. Celles d'audessous sont Marchands, Laboureurs, Matelots, Artisans. Et en fin les plus basses sont Manceuures, Portefaix, Mendians, & autres personnes qui composent la multitude. De la composition de tous ces membres reüssit vn corps politique & moral, lequel ne sçauoit se bien porter, ny subsister, que par la parfaite correspondance, liaison, & continuité de tous ses membres, *Alterius sic altera possit apem res, & conjurat amice*. Or cecy n'est point vn chimere de speculation, c'est vn discours fondé en l'Escripture sainte au chapitre douzième de la première



miere Epistre aux Corinthiens, où il est demonstré que Dieu, qui anime l'Eglise par son Saint Esprit, il le distribué non seulement au chef, mais encore aux moindres membres selon la proportion, & l'usage de chacun d'iceux. Ainsi deuons-nous dire de la Majesté, & du pouuoir qui appartient à châques peuples pour se regir, maintenir & conseruer. Ils en ont donné la principale fonction à leurs chefs, mais ils ne s'en sont pas priuez totalement : ils n'ont pas entendu se rendre esclaués, ny deuenir stupides, & insensibles comme des troncs de bois. De sorte que nostre Seigneur Iesus Christ ne dédaignant pas de communiquer son Esprit au moindre des fideles, ny de se qualifier l'un de ses membres, on ne fait point de tort au Prince, quand on soustient que les Magistrats, chacun dans leur competence, ont vne participation de son autorité, plus ou moins grande, selon l'estenduë & la dignité de leurs charges, & selon les diuerses fortunes qui arriuent au Souuerain. Par exemple, quand nos Roys ont entrepris des voyages d'Outre-mer, il est certain que les Magistrats auoient plus de pouuoir & plus d'empire que pendant leur presence & residence actuelle. Le mesme arriue-t'il dans les interregnes, le mesme encore pendât les minoritez. Quant est de ce pouuoir absolu, infiny, indépendant, & qui n'a point de bornes, il n'appartient qu'à Dieu seul, lequel ayant vne bonté, vne sagesse, & vne puissance infinie, il n'en sçauroit mal vser. Et ceux qui veulent mettre la Majesté des Roys à ce haut point transcendant & exorbitant, ils pechent cōtre la propre seureté des Princes, & ne font rien pour eux-mesmes : car nous voyons par les histoires qu'ils ont esté les premiers écrasés, & chastiez par la rigueur de leurs propres aduis. Ce n'est pas que nous pretendions icy, en fortifiant le party des Magistrats, affoiblir l'autorité legitime du Prince, ny rien innouer en l'Estat d'une Monarchie de douze cens ans, sous laquelle nos Predecesseurs ont vescu. Je veux croire que nul Parisien & nul François, en sa plus cruelle oppression, n'est pas capable de former cette pensée, & la calomnie du Placard n'est assistée d'aucune apparence, quand il dit que deux cens Conseillers du Parlement se veulent eriger en Tyrans, pour gourmander tout le reste de la France. C'est bien mal entendre leur intention, veu qu'ils n'ont iamais pretendu autre chose que repurger cet Estat de la vermine des Partisans, & de leurs fauteurs ; car quant à l'interest, & à l'honneur des Princes, ny mesme à leurs delices, & à

leurs pompes, le plus impudent calomniateur ne peut pas dire qu'on aye iamais fait la moindre proposition de leur rien retrencher; au contraire on a trouué à dire que les pensions, & autres dépenses de cette nature, qu'il a pleu à leurs Majestez de faire à la Reyne d'Angleterre, ayent esté employées dans des comptans, comme des parties honteuses & indignes d'estre auoiées, & mises au iour. On n'a iamais trouué à redire à la magnificence de leurs Palais; bien au contraire, le peuple en voyant le luxe des Fauoris & des Financiers, a tousiours murmuré de ce qu'on n'acheuoit pas le bastiment du Louure. Tout ce grand appareil de Gardes Escossoises, Suisses, Françoises, n'a iamais esté controllé ny du Parlement, ny du peuple; ouy bien celles qui ont esté vsurpées par le defunct Cardinal, & par celui-cy. Les seules liurées du Roy, sur les espaules du moindre Valet de pied, sont respectées & cheries par tout, encore dans ce temps malheureux, auquel on veut affamer Paris, les Pouruoyeurs de leurs Majestez sont priuilegiez, & enleuent tout ce qu'il leur plaist dans nos marchez; & dernièrement que par vn stratageme, qu'on ne peut honnestement nommer, on fit cesser l'ordinaire des Officiers du Roy, il n'y eust bon Bourgeois qui n'en fust indigné, & qui ne fist offre de sa bourse pour reparer ce scandale. Mais comme cette affectation est due au Roy & à la famille Royale, c'est vn soulleuement de cœur, & vne auersion generale que le peuple, le Parlement, & tous les Nobles ont contre les Fauoris, Flatteurs, & autres Brigans publics; & l'on s'estonne avec sujet par quelle fatalité la Reyne aymé mieux voir triompher cette canaille, que de consentir à la iustice qu'on luy en demande depuis tant d'années. Il y a quelque temps qu'il mourut vn Commis de Finances nommé \* \* \*, qui n'auoit ny femme, ny enfans, & auoit peut-estre plus de reuenu que tous les Ducs de Vintenberg ensemble. Ce bien là estoit acquis de sorte, que son propre pere fit conscience d'y vouloir participer. On proposa que le Roy s'en deuoit emparer, les Brigans Majours s'y opposerent, & n'en voulurent pas permettre la consequence. Mais posons que le bien de ce Financier fust tres-legitimement acquis; n'eust-il pas esté de plus iuste conqueste, que la subsistance imposée sur cinquante villages, ou la taxe de cent aisez qui n'ont trempé ny dans les prests, ny dans les autres vsures? Il est sans doute, Or qui est-ce qui empesche nos Princes de comprendre ces veritez? les flatteurs, les bouffons,



les impies. Qu'il en pourroit bien esclaireir? Les bons Conseillers de quelque robbe qu'ils fussent: car ce seroit grand' pitié qu'il n'y eust de probité en France, que sous la foustanne du bonhomme Broussel. Mais qu'on ne s'attache point simplement aux gens de la robbe, il y a tant de bons Gentilshommes dans les Provinces, qui ont renoncé à la Cour & à toutes ses pompes, & qui ne seruent plus qu'à decider les differens de la chasse, & de la primauté de pain benist. Vne douzaine de ces gens-là ne cousteroient pas tant à entretenir, qu'une troupe de Comediens d'Italie. Nous en auons de plus qualifiez, qui ont veu plusieurs regnes, & qui ont pratiqué dans les Royaumes estrangers, comme vn bon homme Bethune, vn Saint Chaumont, & tant d'autres, que leur modestie retient dans leurs maisons. Il y a aussi de bons & saints Euesques, qu'il faudroit appeler, & chasser ceux qui sont de mauuais exemple; ainsi on pourroit facilement paruenir à vne heureuse reformation, sans toute fois rien diminuer de la grandeur & de la Majesté de nos Roys: car ie voudrois tousiours insister sur ce poinct, & leur faire bien comprendre, que l'intention du peuple ne fut iamais de rien diminuer de leurs richesses, domaines, commoditez, & magnificences; mais seulement de reformer le luxe & la tyrannie des Fauris, des Maletostiers, & de leurs adherans. Or ce legitime dessein ne peut estre pris pour vn rétreffissement de la grandeur & de l'amplitude Royale, puis que Dieu mesme tout-puissant qu'il est, n'est pas moins grand pour estre dans l'impossibilité de mal faire. Cela estant ainsi, on ne peut pas iustement accuser ny le Parlement, ny la ville de Paris, d'auoir voulu tant soit peu effleurer la Majesté Royale; au contraire le vray & unique dessein des gens de bien & des fideles sujets du Roy, c'est de ne souffrir pas qu'il s'esleue vne Oligarchie dans l'Estat, & qu'une centaine de brigans oppriment tout vn Royaume pour viure dans les superfluités & dans les delices. La iustice de ce bon dessein ne pouuant estre contredite, & la Reyne mesme la cognoissant assez en sa conscience, quelle difficulté peut-elle faire de consentir à cette reformation? Les Maletostiers par leurs Placards forment deux objections. La premiere est vn poinct d'honneur: ils ne veulent pas que cette reformation vienne de l'instinct, & du chef de ceux du Parlement, ny de l'instance du peuple, ny qu'à leur appetit le Souuerain soit obligé d'esloigner aucun de ses Ministres. Par cette raison d'hon-

neur il s'ensuiura que ny Roy, ny Prince, ny aucun homme de cœur ne deura point se défaire d'aucune mauuaise habitude, dont son Confesseur, ou son Curé, ou quelque domestique consciencieux luy aura donné l'aduis, de peur que cet aduis ne luy dérobe le mérite & la gloire de l'action. L'autre obiection que l'on fait à Messieurs du Parlement, est qu'ils ne se sont pas portez à poursuiure cette reformation par vne generosité & par vne iustice gratuite, mais par vn ressentiment du refus de quelques pretentions qu'auoient aucuns d'entre eux. Hé bien, accordons que quelques-vns estoient piquez de ce ressentiment, on en a nommé six ou sept, il en reste deux-cens autres; que leur peut-on reprocher? le droict annuel? ils l'ont mesprisé. Bien dauantage, il y en a plusieurs qui sont parens & alliez des Partisans, le sentiment neantmoins du vray honneur les a tellement saisis, qu'ils ont dit; Perissent nos alliances, & nos esperances, & que l'honneur de la Iustice soit restably. Secondement, & sans demeurer d'accord que ces denommez ayent agy par esprit d'interest & de vengeance; est-ce vne chose qui doit sembler nouuelle, ou estrange, que la iustice se rende sur la poursuite des interessez? On execute au milieu d'une place publique vn voleur de grands chemins, sur la sollicitation d'une veufue, qui se plaint que son mary a esté destrouffé & assassiné. La iustice qui s'en fait, est-elle moins legitime, & ne reussit-elle pas au bien du commerce, & à la seurreté publique? Se fait-il quelque chose en ce monde sans l'impulsion & le motif de l'interest? n'est-ce pas le premier mobile de toutes les amitez, & de toutes les haines? & fied-il bien à des esclaués de faueur, à des idolatres d'argent, à des ames corrompues iusques dans le pepin, de reprocher à ceux du Parlement que quelque interest les a esmeus à s'éuertuer, & à trauailler au soulagement du peuple? Depuis quand ces Epicuriens de la Ville-neufue sont-ils deuenus Stoïques, pour pretendre que la vertu n'a point besoin de l'esguillon, & de la chaleur des passions? *Et ingulenti homines, surgunt de nocte latrones; ut se ipsum serues non expereueris.* Il n'y aura ny perfidie, ny cruauté qu'ils n'exercent pour la conseruation de leurs prests vsuraires; & les bons Citoyens, les Magistrats legitimes ne s'opposeront pas à tous ces desbordemens, & ne s'esueilleont pas en fin sur l'inuasion & le pillage de ces brigans? Or ce n'est pas merueille qu'ils se soient ainsi ralliez entr'eux, & qu'ils employent toutes sortes d'artifices pour se maintenir dans

leurs



leurs déprédations: mais ce qui désolé les gens de bien, & qui desespere les affligez, c'est de voir qu'ils ont préoccupé les oreilles & les affections des Princes, auprès desquels ils ont descrié le peuple, & calomnié les Magistrats. La troisieme objection qu'ils font au Parlement, c'est la jeunesse & l'inexpérience de quelques-vns. Or c'est à Monsieur le Chancelier qu'ils y a introduits, de garantir cet inconuenient: mais ce ne sont point ces ieunes-là qui se font escouter dans la Compagnie, ce sont ceux du moyen aage qui sont hors de l'impetuosité de la jeunesse, & qui ne sont pas encore affoiblis par la decrepitude. Au reste, on ne conteste point qu'il n'y en puisse auoir parmy eux d'imparfaits & de defectueux: mais ce n'est pas en la veüe, & du costé que les ennemis de la Compagnie les considèrent; le plus coupable, & le plus meschant à leur gré, c'est celuy auquel nous venons d'eriger des statües & des images: Ils le tiennent pour vn seditioneux, & pour vn seducteur; & nous le tenons pour vn homme iuste & innocent, qui a fait vne habitude de vertu par vne pratique de cinquante ans, depuis lesquels il a exercé l'Office de Iudicature irréprochablement. Sous le règne de trois Roys, sous deux Regences, sous la censure de six premiers Présidens, à la veüe de mille Conseillers, en mille importantes affaires, ce Sénateur a rendu des preuues de sa generosité, de sa pieté, & de son zele; & à l'aage de soixante & quatorze ans, sur l'aduis de Catelan ou de la Railliere, on le surprend, & on l'enleue comme vn criminel, & à moins que du secours de quatre cent mille ames qui se souleuent en sa faueur, on ne sçait pas à quelle fin on le destinoit. Voicy maintenant qu'à son sujet tout ce grand peuple qui l'a secouru, est en proscription & en peril de mourir de faim. Cependant on nous veut faire croire que ce n'est point au peuple à qui on en veut, mais seulement qu'on le veut obliger à se défaire du Parlement. Or ny le peuple n'est pas resolu de huer le Parlement, ny de se laisser mourir de faim. Il y a deux mois qu'il demande à sortir, & à combattre, la seule prudence des Generaux qui cherchent leurs mesures, le retient; il est animé & persuadé de la bonté de sa cause, c'est vne iuste defense. Les Theologiens en parleront à leur mode, & chacun sçait ce que le Prouincial des Capucins en dist à la Reyne, huit iours apres sa retraite de Paris; il n'auoit esté suborné de personne, ny pris autre instruction que de l'E'sprit de Dieu. Mais voicy comme les Iuriconsultes en disent au Titre, *De iustitia & iure*: Ils disent qu'il y a vn

droict naturel comprenant tous les animaux, & tous les hommes, qui leur fournit vn instinct pour leur propre conseruation, non seulement de l'individu, mais mesme de l'espece : c'est de là que vient la conjoinction du male & de la femelle; de là vient le mariage, la procreation, & l'education des enfans. Subordinément il y a vn droict des gens, qui appartient seulement aux hommes, mais aussi comprend il tous les hommes, comme la Religion & la creance de Dieu: la pieté vers les parens & la patrie, la résistance aux injures & aux torts qu'on nous veut faire, que nous appellons legitime defenseue; & que comme ainsi soit que par la nature nous soyons tous alliez & apparentez les vns avec les autres, il s'ensuit que c'est vne abomination quand vn homme dresse des embusches pour surprendre, pour tromper, & pour offenser vn autre homme. Ils adioûtent que par ce droict des gens, les guerres ont commencé, que les peuples se sont distinguez, recueillis & cantonnez; que les Royaumes se sont formez, & qu'on a estably des Roys. De cet endroit si notable, nos Politiques qui ne recognoissent point d'Euangile, & qui n'admirent que la prudence humaine, pourroient prendre suffisante instruction, & apprendre premierement qu'il y a vn Dieu, par le consentement de toutes les nations, qui sont vniuersellement imbuës de cette cognoissance. Secondement, qu'il faut aimer sa patrie & ses parens; & le troisieme precepte vniuersellement receu, c'est la defense legitime. Ce sont trois grands Iurisconsultes qui nous font cette leçon, & qui estoient pour le moins aussi qualifiez que nos Chanceliers, & premiers Presidens. Et Iustinian Empereur de l'une & l'autre Rome, prescriuant des Loix à toute la terre, commence son Digeste par ces trois capitales maximes: Sur lesquelles, & à propos du sujet que nous traitons, il y a lieu de louer ce grand Docteur de la France, Iacques Cujas, lequel interpretant exactement & philosophiquement ces termes de Pomponius, *Reluti erga Deum religio: ut parentibus & patrie pareamus*, il escrit ainsi: *Ordo non placet, nam prima officia debemus Deo, secunda Patrie, tertia Parentibus*. Si la Patrie marche en ce rang, & immédiatement après Dieu, quelle est la peruersité, l'iniquité, & la sceleratesse de ceux qui en abandonnent l'honneur, & ne se soucient pas de la voir reduire en seruitude? Aussi voyons nous que ce sont des Siciliens, des Angeuins, & des Catalans, qui ont resolu la destruction de cette grande Cité, & il est presque impossible



d'imaginer qu'un homme baptisé dans la Paroisse de saint Eustache, ou de saint Mederic, puisse contribuer ny consentir à la ruine de Paris. Il est pareillement veritable que ces mangeurs de Chrestiens, auparavant que d'en venir à ces extremitéz, i faut qu'ils ayent effacé le caractere de l'humanité, avec celui de leur Baptisme, par vne loque habitude de mal faire, & par vne resolution affectée de ne pas croire en Dieu. C'est sur ce fondement qu'ils n'ont pitié de personne, qu'ils en prennent de toutes parts, & qu'ils ne sont interrompus ny inquietez dans leurs delices d'aucun scrupule, ny d'aucun remords. Quelqu'un d'entre-eux qui n'est plus au monde, comme on l'aduertissoit que du temps du Chancelier de Sillery, on n'vsoit pas de si violentes procedures: il respondit, De ce temps-là nous craignons tout, à present nous ne craignons rien. Pour paruenir à cette audace, il y a deux voyes, la premiere, & la plus battüe, c'est vne mauuaise naissance destituée d'instruction & de discipline; ils n'ont entendu ny Catechisme ny preceptes; on les a mis ieunes dans yn Berlan, ou chez vn Financier, comme en conditions plus aduantageuses que celles d'un College, ou d'un mestier legitime: Ils n'ont veu que des dez & des cartes, ils n'ont ouy ny veu que de mauuais commerces: C'est par or & par argent que leurs Maistres ont acquis ces belles maisons, & ces beaux meubles, & qu'ils ont marié leurs filles avec toute cette Noblesse; ils feront par consequent sur ces exemples tout ce qui leur sera possible pour auoir de l'or & de l'argent, qui est la monnoye de toutes les commoditez, & de toutes les dignitez. L'autre chemin qui conduit à cette insolente cruauté, c'est celui que tiennent les personnes d'une extraction ingenuë, lesquels ayans esté bien instruits de ieunesse, & se trouuans dans les aises de la vie, ils s'y abandonnent si desordonnement, que pour en iouir plus pleinement, & d'une felicité plus entiere, par estude & par force d'esprit (ainsi qu'ils parlent) ils trauaillent à estouffer toutes les semences de vertu qui ont esté iettées dans leurs ames, & ne veulent plus escouter ny les conseils des gens de bien, ny les reproches de leurs consciences; c'est alors qu'ils font passer leurs crimes & leurs impietez en aphorismes, qu'ils se moquent des mœurs & des creances anciennes, & renoncent à toute pieté vers Dieu, & à toute pitié vers les hommes. De ces deux especes de gens sont composez tous ceux qui oppriment le Peuple, qui offusquent la Noblesse, & qui scandalisent l'Eglise. On s'estonnera icy, & à bon droit, &

c'est ce qui fauit nos voisins en admiration, veu que ces gens-là ont conjuré contre le repos public, & que ce sont les monstres & les pestes de la société humaine; d'où vient que par vn concours, & à cry public, on ne s'esleue pas contre eux, comme on fait à l'encontre des loups & des sangliers qui rauagent la campagne. En voicy deux ou trois raisons, c'est qu'ils ont des Protecteurs & des Sauuegardes, & tout de mesme que les cerfs & les sangliers ruinent impunément les moissons des laboureurs quand ils ont vn Seigneur ou vn puissant voisin qui aime la chasse, & qui defend d'auoir des chiens, & de porter l'arquebuse. Ainsi en arrive-t'il quand le Prince ou le haut Magistrat entreprend la protection du Parrisan, & qu'il destine sa table & sa maison pour ses diuertissemens, & sa bourse pour le fonds de son espargne. Au temps passé, ainsi que nous l'auons appris des vieilles gens, l'alliance de ces gens-là estoit prise pour vne pollution & vne derogation à Noblesse, maintenant on en fait le soustien des maisons, & de leur argent on en repare les familles ruineuses & délabrées. Dieu sçait quelle posterité il en reüssit! Allez puis apres deferer en Iustice vn Financier ou vn Traitant, qui s'est fortifié de telles alliances? L'autre raison, sous l'ombre & le benefice de laquelle ces gens-là trouuent leur abry, & leur euasion; c'est la formalité de Iustice, laquelle formalité quand elle est sincerement & fidelement obseruée, est d'un très-grand & très-necessaire vsage: mais quand elle est trop superstitieusement appliquée, elle deuient vn retardement & vn obstacle au bien public; comme aussi quand elle est malignement & frauduleusement administrée, elle degenere en illusion, & en iniustice; & c'est dedans ces prestiges, & parmy ces ombres, que le cauteleux Iusticier fauorise, & fait échapper qui bon luy semble, contre la droite intention de la Loy. Telle estoit la iustice des anciens Pharisiens, contre laquelle l'Euangile est tout plein de reproches & d'inectiues. La maniere d'Epaminondas estoit bien plus franche, & plus brieue: Il enuoya vn homme de mérite, qui auoit bien seruy en guerre, chez vn riche de Thebes luy demander mille escus. Celuy-cy vint tout à l'instant trouuer Epaminondas, pour sçauoir de luy à quel titre il le condamnoit de bailler ceste somme à ce Soldat: C'est, dit-il, parce qu'il a bien seruy la Republique, & qu'il en a besoin, & que tu es vne personne inutile, & qui en as plus que tu n'en mérites. Ce mandement fut executé, & n'excita ny sedition,



ny murmure; il passa pour vne action de Justice: Et nous sommes si malheureux, & si traistres à nostre bonheur, que pour mille francs qu'on aura imposez sur vne femme qui a plus de dorures qu'une Reyne de Saba, on verra des familles en rumeur, qui crient au meurtre, & qui se scandalisent de cette rigueur; & cependant ils ne firent jamais de conscience de la ruine de plusieurs milliers d'hommes, qui ont esté despoüillez par l'Exacteur qui a basti tous ces Palais, & amassé vne montagne d'or. Il y a quelques années qu'un homme assez imaginatif nous surprit fort agreablement par vne vision qu'il nous raconta: Il nous dist qu'il venoit de voir dans des chaudières & des marmites bouillantes des Elections toutes entieres; il sortoit de l'Eglise Nostre-Dame; ie crû que c'estoit que dans la meditation des quatre fins de l'homme il auoit eu quelque forte imagination des peines d'Enfer: Il nous expliqua en fin sa figure, en nous disant, qu'il venoit d'une maison du Cloistre où l'on attendoit Monsieur Desfiat à dîner, & qu'il auoit veu des porages & des bisques de prix inestimable, capables d'absorber les Generalitez de Touraine & de Berry. C'est contre ce grand luxe que les gens de bien sont irritez, & contre ceux qui l'entretiennent. Et si quelques Conseillers du Parlement de Paris ont pris à tasche de vouloir mettre des bornes à ces grands excès; si le Garde des Seaux de Marillac y auoit trauaillé de son temps, & si tous les Legislateurs ont eu esgard à ce desordre, escouterat-on des Bouffons de Cour & des Gourmands contre des intentions si loüables? N'est-ce pas vne impudence capitale de presenter à la Reyne vne bouchée de pain, & luy faire à croire qu'elle vaut vne pistolle à Paris. Et ces railleries sanglantes iointes à l'histoire de Charles sixiesme, ne sont-elles pas damnables? Messieurs du Parlement, Messieurs les Princes, & tous vous autres bons François qui voulez la reformation de l'Estat, & le soulagement du peuple; ne deschargez pas toute vostre indignation sur le Ministre Estranger: il n'en seroit iamais venu là, s'il n'y auoit esté porté par la trahison de quatre ou cinq Domestiques, qui luy ont donné des aduis, & luy ont déclaré le foible du Maistre, & de la Maistresse. Ainsi conseillerent-ils Conchine; ainsi seruirent-ils les Luines; ainsi se prostituerent-ils au Cardinal de Richelieu; ainsi raillerent-ils la Reyne Mere, qu'ils auoient tant idolatrée. On les cognoist, on sçait leurs malices, on en sent le prejudice, & on les espargne. Permettez-nous au moins de les nommer, & d'en faire vn

Catalogue public, comme on fait des Interdits en l'Estude des Notaires. Cependant il n'y a ny Prince ny Magistrat, pour vaillant & innocent qu'il puisse estre, pour eminent que soit le degré de sa naissance, ou de sa vertu, qui se puisse assurer d'estre hors des prises, & des atteintes de leur insolence. Nous auons ouy dire de fort bonne part, que le feu Roy ayant esté trauaillé durant toute vne nuit d'un songe qui luy representa les detresses où estoit la Reyne sa Mere, & les reproches qu'elle luy en faisoit: Il s'esueilla en sueur & en fièvre, dont son Medecin Bouuard ayant donné aduis au Cardinal de Richelieu, on attitra les Bouffons, lesquels sur l'apresdisnée entretenant ce trop credule Prince de differens sujets: L'un d'entr'eux ayant voulu faire le recit d'un songe, qu'il feignoit d'auoir eu quelque nuit auparauant, qui luy auoit donné de l'inquietude, les autres l'entreprirent, le raillerent, & le traiterent de ridicule; ainsi penserent-ils eluder cette inspiration du Ciel. Le Roy neantmoins estonné de sa vision, s'en declara au Cardinal, qui la sçauoit déjà, lequel adroitement luy dist, qu'il falloit donc rappeler la Reyne sa Mere; mais qu'il falloit que ce fust honorablement, & en payant les debtes qu'elle auoit contractées chez les Estrangers, & qu'il en feroit dresser l'Estat. Il n'est pas besoin d'en dire la suite; suffit de faire paroistre de quels artifices, & de quels charmes ces pernicieuses gens-là enforcellent, & damnent les Princes. Non, ny les Iuifs, ny les Vsuriers, ny les faux Monnoyeurs ne sont point si dangereux dans les Republiques. C'est neantmoins du milieu de ces gens-là que nous attendons l'éducation de nostre ieune Prince. Pensez, Messieurs du Parlement, si vous n'en deuez point faire vn article exprez de vostre Conference, & voyez si le feu Prince de Condé a voulu que Messieurs ses enfans pendant leur ieunesse, & tant qu'il a vescu, fussent halenez de ces pestes. Il se presente vn quatrième obstacle contre les bons desseins de ce Party: C'est la ialousie de plusieurs Officiers, qui ont regret de voir accroistre l'autorité du Parlement, & qui se confondent de leur paresse, & de leurs lasches conuiuences: Car quant à ceux qui ont eu participation de profit avec les Traittans, ils sont gibier de Tournelle & de Chambre de Iustice. Mais il ya de pacifiques Seigneurs, qui verroient toute la ville en feu, & ne voudroient pas contribuer vn verre d'eau pour l'assoupir & pour l'esteindre, pourueu qu'ils eussent assurance de n'en estre point endommagez. Du coin de leur feu, &



derriere leurs parauens ils preuoient des consequences; Ils apprehendent des changemens en l'Estat, & en la Religion. Cependant ny eux, ny ceux qui les conseillent, n'ont point le vray zeile de l'Estat ny de la Religion, si ont bien celuy de leurs interrests. *Prinata res semper offerunt*, dit le grand Historien, *officietque publicis consiliis*, dit le grand Prophete Tite-Liue. Mais pour traiter dignement ce sujet, il y faudroit employer plusieurs Philippiques. Il reste de toucher vn mot de l'interest du menu peuple de Paris, lequel se remettant à Messieurs les Princes & Magistrats d'auancer les propositions plus releuées & plus generales, il demande en son particulier la continuation du Commerce, & des manufactures pour le soustien de sa vie, & ne souhaitte rien tant que le retour de leurs Majestez, avec l'ancienne Cour Françoisse. Car pour ce qui est du Ministre Estranger, il en a plus d'horreur que de la faim & de la guerre, ainsi qu'il l'a fait souuent entendre par ses cris, & par le zeile de ses sorties, dont l'effet n'a esté retardé que par la prudence des Generaux. Ainsi depuis deux mois, quelques secousses d'afflictions & de tentations qu'on luy aye données, il n'a point fait iour pour se des-vnir. Et c'est vne manifeste prouidence de Dieu, qu'une si vaste ville, si peu disciplinée, se soit si paisiblement conduite & maintenüe. N'est-ce pas vne autre merueille, que nous deuons adorer le ventre contre terre; que nonobstant la persecution de nos ennemis, qui nous enuironnent de toutes parts, il se trouue du pain suffisamment pour nourrir tout ce grand peuple, chargé de plus de cinquante mille mendiens. Il paroist bien par ce rayon de misericorde, que Dieu ne nous veut pas encore abolir pour ce coup, & que le ieusne forcé conjoint avec nos volontaires mortifications, produira bien tost vn bon amendement à nos mœurs, & en suite vne salutaire deliurance. C'est l'esperance que les gens de bien de ce Party conçoient, c'est à quoy ils exhortent de traualler ceux de l'autre, s'il sy trouuoit quelque ame cōscientieuse & genereuse. Mais est-il donc besoin d'une vertu extraordinaire & heroïque, pour porter vne parole de iustice à l'oreille d'une Reyne & de deux Princes? est-ce vne medecine si amere & si dégoustante que la proposition d'un bon conseil? Ne s'est-il peu rencontrer aucune creature parmy tant de deuotes, qui aye osé presenter cette potion, que la femme d'un Apothicaire Espagnol? Quoy! il s'est trouué assez de zeile pour abbatre de la chaire vn des plus grands Predicateurs de l'Eglise, par vn concert de femmes, & par

vne ialousie d'escole? & on redoutera de faire vne pieuse proposition  
 pour vn bien public? Pieuses ames de l'vn & l'autre sexe qui gouver-  
 nez cette Princeſſe depuis tant d'années, & qui ſçauéz ſi bien fleſchir  
 ſes inclinations à la meſure de vos intereſts, n'aurez-vous aucun ſen-  
 timent des miſeres publiques, & de l'honneur de voſtre Patrie? Aban-  
 donnerez-vous le ſalut de voſtre Maiſtreſſe? N'oſerez-vous hazarder  
 vn Conſeil Euangelique entre ſa Confeſſion & ſa Communion? Elle  
 en fait de ſi fréquentes. O Confeſſions, ô Communions fréquentes!  
 que ne vous iuſtificz-vous par vous-mêmes? Et pourquoy donnez-  
 vous tant d'auantage à la Théologie d'Arnault? Saintes Religieuſes  
 du Val de Grace, on ne vous exhorte point de pretendre aux Marty-  
 res des ſainctes Agnes & ſainctes Catherines; faites ſeulement cet  
 effort ſur vous, de ſupplier la Reyne de pouruoir au Roy ſon fils d'une  
 bonne education. Qu'on ſeculariſe le plus ſolitaire des Chartreux,  
 le plus auſtere des Capucins pour habiter avec luy dans ſon Louure,  
 & pour l'informer en la crainte de Dieu, qui eſt le commencement de  
 toute ſapience; & que tous perfides Courtiſans en ſoient pour iamais  
 oſloignez. Que ſi vous eſtes trop timides pour propoſer ce conſeil, &  
 que les reſpects humains vous interdiment la parole, nous nous adreſ-  
 ſons à vous, Sereniſſime Infante, qui regnez dans les Cieux par le  
 titre de voſtre perſeuerante vertu. Iſabelle Claire Eugenie, mode-  
 le parfait des ſainctes Veufues, & des ſages Princeſſes, prenez ſoin  
 d'Anne Marie Mauricette d'Autriche, voſtre Niepce & noſtre  
 Reyne; impetrez-luy la grace de nous gouverner ſur le patron de vos  
 bons exemples. Et puis que les Princes avec tant de liberalitez & de  
 bienfaits ne peuuent que rarement trouuer dans leurs Cours des  
 Conſeillers fideles & genereux, enuoyez de l'autre monde quelque  
 Intelligence lumineuſe & penetrante, qui inſtruiſe cette Princeſſe de  
 ſon deuoir, & qui la faſſe fleſchir ſous la puiffante main de Dieu.  
 Nous vous remettons librement & reſpectueuſement ce point  
 d'honneur, & conſentons tres-volontiers qu'elle tienne pluſtoſt certe  
 grace de voſtre interceſſion, & de la miſericorde de Dieu, que ny de  
 la compaſſion de nos miſeres, auxquelles elle eſt endurcie; ny des re-  
 monſtrances du Parlement qu'on luy fait meſpriſer; ny du ſecours de  
 nos amis, ny de la reſiſtance de nos armées.

